

حكايات ع الساقية

كان الفجر يوماتي يخبّط
من فوق بابنا و بيصحينا
تصحى الضحكة من قبلينا
تنده ع الشمس النعسانه
فوق سطح بيوتنا ومبسوطة
واما بتقلق من ضحكتنا
تفرش ريحة الندى ع التوته
تسبقتنا في الفجر أحلامنا
نلقى نهارنا صبح شبابيك
والنسمة بنوته
بتلعب مع الفراشات
والضلة ضفاير فضه وفيونكات
حكايات ع الساقية مفروشه
والساقية حدوته

ف ودان النخيل بلحات
ويا خدنا غُنا العصافير
لحد باب الجنه
نملا جيوبنا غُنا
نحلم ونتمنى
ونرمي في عين الشمس
أحلامنا
عَيْل وفاكر ف السما
مطره ببرنيطه
والتاني مستني
إمتي يشق الحيطه
وغيره يحب اللمه والزيطه
وأنا لسه فارد جلابيتي
وف ديلها اخر حلم
بشريطه

....